



**Kommunini sulisut meeqqanik inuusuttunillu ajornartorsiuteqartunik tunngasunik oqaloqatigiinnissat siunertaralugit sulisut pineqartut qanoq assigiinnigitsunik amerlatigisunik, kiisalu suliassiissutinik sulinerminnilu qanoq nammataqartiginersut, taamatullu suliassanut nukissanik naammaattunik peqartitsinersoq, kiisalu isumaginnittunut suliassat qanoq amerlassuseqarnissaat pillugu periarfissaqarneris, tamannalu pissusissamisoortuunersoq pillugit oqaloqateqarnissaq. Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut misissuinerisa naliliinerisalu inernera nalunaarusiorneqarluni kingusinnerpaamik 1. april 2016 Inatsisartunut tunniunneqassaaq.**

(Inatsisartunut Ilaasortaq Aaja Chemnitz Larsen, Inuit Ataqatigiit)

### **Siullermeerneqarnera**

Inatsisartunut Ilaasortaq Aaja Chemnitz Larsen Inuit Ataqatigiit, aalajangiiffigisassatut siunnersuuteqarpoq, tamannalu oqaaseqarfigissavarput.

Nunatsinni meeqqat inuusuttullu peroriartormikkut sullinneqarnermikkullu sumiikkaluarunilluunniit nunatsinni tamani sullinneqarnermikkut pitsaasumik atugassaqtitaallutik inuuneqarnikkut ineriartornissaat Partii Naleqqamiit pingaaruteqarluinnartoq oqaatigeqqaarusupparput.

Nunatsinni inuuniarnikkut isumaginninnikkullu atukkagut sumiiffimmiit sumiiffimmut assigiinnigilluinnartut nassuerutigisariaqarparput, naak inatsisitigut sinaakutissat malitassallu assigiikkaluartut.

Tamannalu aamma soorunami innuttaasunik sullissinermi sulisut ilinniarsimasut amigaataanerannik pissuteqartoq oqaatigissallugu eqqorunarpoq, pissutsillu atugassarititaasut pitsaanerulertariaqarput.

Innuttaasunik sullissinermi aporfiusartut ikilisarlugillu aaqqinniarnissaat sulinermilu sulisunut atugassarititaasut pitsanngorsarneqarnissaat misissuiffigilluarnissaallu kommunit pisortaqarfiillu peqatigalugit ingerlanneqartariaqalerpoq.

Meerarpassuit ukiuni makkunani angajoqqaaminnik sumiginnarneqartarnerat annertuallaarujussuarpoq akuersarneqarsinnaananilu, tamannalu meeqqamut eqquinerlorujussuuartarpoq ilungersunarluinnartumik inersimasunngornermut allaat sunniuteqartartumik ileqquliukkiartuinnarparpullu tamanna, tassami angerlarsimaffippassuarmit meeqqat pisortanut isumagineqartussanngorlugit nuunneqartarlutik.

Meeqqanik kinguaassiutitigut atonerluisarneq tamavitta akiortariaqalerparput. Tassami ataatsimoorullugu ajornartorsiut taamatullu ikkatiginnilluni soqutigittaannersuaq inersimasut akornaniittoq akiortariaqalerparput. Meerannuanik ikkatilliisarneq ullut tamaasa akiortariaqalerparput.

Inuiaqatigiinni nukissaqarnerulissagutta taava aaqqissugaanikkut ingerlaaserput ataatsimoorullugu nukittorsartariaqarparput, imaassanngilarmi Kommunit Namminersorlutillu oqartussat kisimiillutik suliassat innuttaasunut tunngasut aaqqissuutissagaat.

Inuttut nammineq akisussaaffeqarnerulernissarput angusariaqarparput, inuunerinnerulernissarpullu anguniarlugu uagutsinnut piumaffiginerulernissarput inissittariaqalerparput.

Taamaaliornitsigummi inunnut tunngasut suliassat ikinnerulernissaat angusinnaavarput allanullu nukissaqarnerulissalluta, ila taamaaligaluaruttami qanormita nuannertigissagalarpa.

Inunnik sullissinermi sulisorpassuit ilungersorlutik sullissigalarput, taamaakkaluartoq soorlulimi malunnaangitsut naak tamaviaarlutik sullissigaluartut. Pingaartumik isumaginninnermi sullissisut, ilaatigummi sularisinnaasatik sipporlugit suliassanik tigungmiaqarput tupinnaangilarlu ilaanni nukissaminnik killeqartitsilersarmata.

Pissutsit tamakku aaqqinniartariaqarmata, taava sulisut atugaasa misissuilluarfigineqarnissaat pingaartumik sullissinerit illersorneqarsinnaasumik ingerlassappata pinngitsoorneqarsinnaanngitsoq malunnarmat aaqqiiniutissanik nassaartariaqalerpugut.

Meerarpassuit inuusuttullu isumannaatsumik peroriartussappata inuiaat uagutsinnut isiginerusariaqalerpugut. Ulluinnarni inuusaaserput allangortittariaqalerparput tamatta akisussaaffeqarnerulertariaqarpugut ajornaqaaq taamatuinnaq ingerlasinnaajunnaarpugut.

Sumiginnaanigut isiginngitsuusaarpagut meeqqat atuarfinni naalatsinneqarsinnaanngitsut amerliartuinnarput. Amerlavallaartugut akisussaaffik atuarfimmu tunniunniarsarigatsigu, meerarpassuit atuarnertik naammassigaagamikku uniinnartartut amerlasoorujussuupput. Atuarfik ilungersorluni suligaluarpoq, isumaqarpugulli atuarfiup ingerlanerluppallaarnera pissutigalugu ilinniarnissamut ingerlariaqqinngitsoortartut amerlavallaartut.

Kisianni piviusut taamaanngillat akisussaaffimmik tiguisussat tassa uagut angajoqqaat inuiaqatigiillu.

Ilinniartitaanikkut qaffassaanerit qujanartumik annertusiartorput aammalu isumaginninnikkut sulisussat pisariaqartinneqartut amerliartorput, tamannalu ajunngilluinnarpoq. Kisianni taakkuinnaat tuppallersaatigissanngilagut, tassami ulluinnarni inuuneqarnitsigut allangortitsigutta inuunerissaarnerulerlutalu sorpassuit ajornartorsiutigisartakkagut namminneq ikiliartulissagaluarput, inuiaqatigiinnut tamanut nukittorsaataasumik.

Siunnersuut soqutiginarpoq nalunaarusiortoqassappallu isumaqarpugut Upernaamut 2016-imut saqqummiussinissaq siusippallaartoq, qulaajagassammi annertoqaat inulerinerup iluani suliffinni, taamaattumik Naalakkersuisut allannguutissatut siunnersutaat isumaqatigalugu Partii Naleqqamiit oqaatigissavarput.

Siunnersuuteqartorlu Aaja Chemnitz Larsen Inuit Ataqtigiit qutsaviginiarparput inulerinerup iluani suliassat pitsaanerusumik suliarineqartarnissaat siunnerfigalugu saqqummiussaqqarmat, inaasutigissavarpullu peqqinnissamut isumaginninnermullu ataatsimiititaliami suliarineqassasoq.

Qujanaq.